

四庫全書薈要

• 乾隆御覽本

集部

欽定四庫全書薈要

集部

御定歷代賦彙外集卷十

御定歷代賦彙外集卷十

行旅

述行賦

有序

漢  
蔡邕

雞車  
二年秋霖雨逾月是時梁冀新誅而徐璜左官五  
侯擅貴於其處又起顯明苑於城西人徒凍餓不得其  
命者甚衆白馬令李雲以直言死鴻臚陳君以救雲抵  
罪璜以余能鼓琴自朝廷敕陳留郡守遣余到偃師病

不前得歸心憤此事遂託所過述而成賦

余有行於京洛兮邁淫雨之經時塗迤邐其蹇連兮潦  
汙滯而為災馬桀蹢而不進兮心鬱悵而憤思聊弘慮  
以存古兮宣幽情而屬詞久余宿於大梁兮誚無忌之  
稱神哀晉鄙之無辜兮忿朱亥之篡軍歷中牟之舊城  
兮憎佛肸之不臣問甯越之裔胄兮藐髣髴而無聞經  
圃田而瞰北境兮晤衛康之封疆迄管邑而增感歎兮  
愠叔氏之啓商過漢祖之所隘兮弔紀信於滎陽降虎



牢之曲陰兮路丘墟以盤紮勤諸侯之遠戍兮侈申子  
之美城稔濤塗之復惡兮陷夫人以大名登長坂以凌  
高兮陟蔥山之蹇峻建撫體而立洪高兮經萬世而不  
傾迴峭峻以降阻兮小阜寥其異形岡岑紆以連屬兮  
谿谷賈其杳冥迫嵯峨以乖袞兮廓巖壑以崢嶸攢棧  
樸而雜榛楛兮被沆濯而羅布疊炎萑與臺茵兮緣層  
嵒而結莖行遊目以南望兮覽太室之威靈顧大河於  
北垠兮瞰洛汭之始并追劉定之攸儀兮美伯禹之所

營悼太康之失位兮愍五子之歌聲尋脩軌以增舉兮  
邈悠悠之未央山風泊以飈涌兮氣慄慄而厲涼雲鬱  
術而四塞兮雨濛濛而漸唐僕夫疲而劬瘁兮我馬虺  
隤以玄黃格莽丘而稅駕兮陰曠曠而不陽哀衰周之  
多故兮眺瀕隈而增感忿子帶之淫逆兮唁襄王於壇  
坎悲寵嬖之為梗兮心惻愴而懷慄乘舫舟而汴湍流  
兮浮清波以橫厲想宓妃之靈光兮神幽隱以潛翳實  
熊耳之泉液兮總伊瀍與澗瀨通渠源於京城兮引職

貢乎荒裔操吳榜其萬艘兮克王府而納最濟西溪而  
容與兮息輦都而後逝愍簡公之失師兮疾子朝之為  
害玄雲黯以凝結兮集零雨之溱溱路阻敗而無軌兮  
塗寧溺而難遵率陵阿以登降兮赴偃師而釋勤壯田  
橫之奉首兮義二士之夾墳佇淹留以俟霽兮感憂心  
之殷殷并日夜而遙思兮宵不寐以極晨候風雲之體  
勢兮天牢湍而無文彌信宿而後闕兮思逶迤以東運  
見陽光之顥顥兮懷少弭而有欣命僕夫其就駕兮吾

將往乎京邑皇家赫而天居兮萬方徂而並集貴寵扇  
以彌熾兮僉守利而不戢前車覆而未遠兮後乘驅而  
競入窮變巧於臺榭兮民露處而寢濕清嘉穀於禽獸  
兮下糠粃而無粒弘寬裕於便辟兮糾忠諫其駸急懷  
伊呂而黜逐兮道無因而獲入唐虞眇其既遠兮常俗  
生於積習周道鞠為茂草兮哀正路之日忽觀風化之  
得失兮猶紛挐其多違無亮采以匡世兮亦何為乎此  
畿甘衡門以寧神兮詠都人而思歸爰結蹤而迴軌兮

復邦族以自綏亂曰跋涉遐路艱以阻兮終其永懷窘  
陰雨兮歷觀羣都尋前緒兮考之舊聞厥事舉兮登高  
斯賦義有取兮則善戒惡豈云苟兮翩翩獨征無俦與  
兮言旋言復我心胥兮

叙行賦

晉  
張載

歲大荒之孟夏余將往乎蜀都脂輕車而秣馬循路軌  
以西徂朝發軔於京寓兮夕予宿於穀洛踐有周之舊  
墟陟丘荒以寥廓讚王孫於北門問九鼎於東郭實公

旦之所卜曷斯水之噴薄入函谷而長驅歷新安之西  
阜行逶迤以登降陟二嶠之重阻經欽岑之險巖想姬  
文之避雨出潼關以迴逝仰華嶽之崔嵬勤大禹之疏  
導豁龍門之洞開舍予車以步趾翫卉木之璀璨翳青  
青之長松陰肅肅之高柞緣阻岑之絕崖蹈偏梁之懸  
閣石壁立以切天岌嵒嵬其欲落超陽平而越白水稍  
幽夢以迴深乘重巖之百層轉木末於九岑浮雲起於  
穀下零雨集於麓林上昭晰以清陽下杳冥而晝陰聞

山鳥之晨鳴聽玄猿之夜吟雖處者之所樂嗟寂寞而  
愁予心造劒閣之崇關路盤曲以晦藹山崢嶸以峻狹  
仰青天其如帶兼習坎之重固形東隘以要害豈乾坤  
之分域將隔絕乎內外

遊居賦

漢班彪

夫何事於冀州聊託公以遊居歷九土而觀風亦哲人  
之所虞遂發軔於京洛臨孟津而北厲想尚父之威虞  
號蒼兕而明誓既中流而歎息美周武之知性謀人神

以動作享烏魚之瑞命瞻淇澳之園林善綠竹之猗猗  
望常山之峩峩登北嶽而高遊嘉孝武之乾乾親飾躬  
於伯姬建封禪於岱宗瘞玄玉於此丘徧五岳於四瀆  
觀滄海以周流鄙臣恨不及事陪後乘之下僚今匹馬  
之獨征豈斯樂之足娛且休精於敝邑聊卒歲以須臾

流寓賦

晉郭璞

戒雞晨而星發至猗氏而方曉觀屋落之隳殘顧但見  
乎丘棗嗟城池之不固何人物之希少越南山之高嶺



修焦丘之微路駭斯徑之峻絕感王陽而增懼詰朝發  
於解池辰中暨乎河北思此縣之舊名蓋曩日之魏國  
詠詩人之流歌信風土之儉刻背茲邑之迴逝何險難  
之多厯望陝城於南涯存號氏之疆場實我姓之攸出  
邈有懷乎乃迹陟函谷之高關壯斯勢之險固過王城  
之丘壟想穀洛之合關惡王靈之壅流奇子喬之輕舉  
遊華輦而永懷乃凭軾以寓目思文公之所營蓋成周  
之墟域

述羈賦

梁簡文帝

奉明后之霑渥將遠述於衡楚歎雲霞之宵漫對江山  
之遙阻是時孟夏首節雄風吹甸晚解纜乎鄉津涕淫  
淫其若霰舟飄飄而轉遠顧帝都而裁見遠山碧暮水  
紅日既晏誰與同雲嵯峨而出岫江搖漾而生風奉璽  
言而遄邁改余玉於江隈遵陽塗而中正軫悲心其若  
頽引領京邑瞻望弗遠戀逐雲飛思隨蓬卷觀江水之  
寂寥願從流而東反

愍塗賦

梁沈約

結榜窮渚思臨長嶼情依舊越身經故楚彼長路之多  
端伊客心之無緒歡因循而易失悲由心而難拒此北  
海之信遼知余思之方阻日掩長浦風埽聯葭疊雲凝  
憤廣水騰華聽奔沸於洲嶼望晡暝乎煙沙依雲邊以  
知國極鳥道以瞻家免悽愴於羈離亦殷勤於行路歎  
余塗之屢蹇奚前芳之可慕

去故鄉賦

梁江淹

日色暮兮隱吳山之丘墟北風折兮絳花落流水散兮  
翠莖疎愛桂枝而不見悵浮雲之離居迺凌大壑越滄  
淵沄沄積水陵陵斷山窮陰匝海平蕪帶天於是泣故  
關之已盡傷故國之無際出汀洲而解冠入溆浦而捐  
袂聽蕪陵之蕭瑟知霜露之流滯對江皋而自憂弔海  
濱而傷歲撫尺書而無悅倚樽酒而不持去室宇而遠  
客遵蘆葦以為期情嬋娟而未罷愁爛熳而方滋切趙  
瑟以橫涕噙燕茹而坐悲乃歌曰芳洲之草行欲暮桂

水之波不可渡絕世獨立兮報君子之一顧是時霜翦  
蕙兮風摧芷平原晚兮黃雲起寧歸骨於松柏不買名  
於城市若濟河無梁兮沉此心於千里重曰江南之杜  
蘅兮色以陳願使黃鵠兮報佳人橫羽觴而掩望撫玉  
琴兮何親瞻層山而蔽日流餘涕以沾巾恐高臺之易  
晏與螻蟻而為塵

出門賦

唐  
歐陽詹

出門辭家兮人有志而思逞予紛然以遠遊別天性之

至慈去人情之好仇嚴訓戒予以勿久指蒲柳以傷秋  
弱室咨予以遄歸目女蘿而起愁心眷眷以纏綿淚浪  
浪而共流惕懷安以敗名曾何可以少留於是驅忠信  
以為車執藝業以為轡越三江而踰五嶺望堯旌以求  
試庶以程功取爵建德揚名獲甘旨以報勤光晝錦以  
迴衡如弧斯張如鳥斯征射百步而期中非三年而不  
鳴颺颺天寒崢嶸歲晚鵲聯翩而不定蓬悠揚而自轉  
逮前程之尚遙顧所離而日遠事紛拏以爭校情交戾

而不和退藩籬則弱羽戀於雲路激龍門則纖鱗限乎  
尺波身違日日之晨昏懷戀戀而莫遣親益年年之羸  
老思摇摇而若何慙靈輒於困窮舉冀缺於壠畝一仁  
聲之永大一孝德之茲久伊錫類以極窮豈今無而昔  
有爾乃循否泰而俟命點風塵以食艱苟疏漠而納流  
願覆簣以成山路實多岐絲無定色任玄黃之濡染信  
疆理之南北管因媒而解縛越自遇而升車虞先榮而  
後悴姜始卷而終舒傷哉數子之稅駕吾未知其所如

臨舟賦

晉應貞

陟縣岡之迢邈臨窈谷之濬遐覽丹源之洌泉眷懸流  
之清波漱玄瀨而漾沚順黃崖而蕩博激重巖之絕根  
拂崇丘之飛甍然後陰渠洞出陽澮旁開倏熠高鶩皓  
暄長懷盤溢鬱沒雲轉颺迴屏側為之飛隕壁岸為之  
陂隤列以青林蔭以綠枝檉松蒨葺於其側楊柳婀娜  
乎其下高溜承崖懸泉屬嶺別流分注冰瑩玉靜清波  
引鏡形無遁影



滯舟賦

唐  
蕭穎士

攝提歲拂衣海嶽應調函洛詠佩服之皋蘭美繫維之  
塲藿徵良圖以趨事窘中道以摧落昔謬價於當年今  
後來之不若衆飛下以抵巇余矩矱而規鑿悲介直之  
不可媒想雲林以自託眷眷離憂行行獨愁遭我車而  
北上竭吾道以東遊愛遲遲之暮春登泛泛之輕舟過  
巖邑以信次纜紫波之下流於時丙丁守位恢台肇節  
朱雲四騰瑤草半歇景冲冲而熾旱風翳翳以歆熱赫

中渾之平沙滲通川而殆竭則有危檣巨舸長艤廣艘  
龍翼錦舳雀顧方艚材木蘭兮竹箭紉齒革與羽毛頓  
修竿於迴塘駢曲岸以戢篙於是迅桴輕槳河舳漢艇  
乘時沂洄赴利馳騁混漁商而沸雜期數日而俄頃事  
也時哉咸適其才吁嗟大艦安得而來借如三江五湖  
之渺漫礧石飄沙之汨渥望赤岸以天低臨清波而景  
沒峻艫衝濤以直透高帆雲卷而上彗朝發乎荆衡夕  
止乎揚越晷刻千里之外一何去留之倏忽彼斗筭鍾

高之餘捷徑趨時之末曾壓溺以不暇亦何知於歲月  
材微則致速而自覆量大則俟時而可貴苟或喻於窮  
通又奚分於器類運之來也賈長淵高視於三台謀不  
用焉梅子真近辭於一尉吾將歛策以飲氣親維舟而  
歛歛

歸途賦

有序

宋謝靈運

昔文章之士多作行旅賦或欣在觀國或怵在斥徙或  
述職邦邑或羈役戎陳事由於外興不自己雖高才可

推求懷未愜今量分告退反身草澤經塗屢運用感其  
心賦曰

承百世之慶靈遇千載之優渥匪康衢之難踐諒跬步  
之易局踐寒暑以推換眷桑梓以緬邈褫簪帶於窮城  
反巾褐於空谷果歸期於願言獲素念於思樂於是舟  
人告辦佇楫在川觀鳥候風望景測圓背海向溪乘潮  
傍山悽悽送歸悠悠告旋時旻秋之杪節天既高而物  
衰雲上騰而鴈翔霜下淪而草腓舍陰漠之舊浦去陽

景之芳蕤林乘風而飄落水鑒月而含輝發青田之枉渚逗白岸之空亭路威夷而詭狀山側背而異形停余舟而淹留搜縉雲之遺迹漾百里之清潭見千仞之孤石歷古今而長在經盛衰而不易

阻歸賦

梁簡文帝

觀建國之皇王選能官於前古元帝慈而布教豈齊聖而作輔伊吾人之固陋宅璇漢而自通躡九枝而耀景總六翮而搏風屬玄玦之啓異逢玉弩之相驚頓天羅

於八表騰雲驅於四溟發伏鼉之雄氣耀策馬之高星  
地通朔易疆鄰北極隴樹饒風胡天少色上月斜臨寒  
松遙直雲向山而欲歛鴈疲飛而不息何愁緒之交加  
豈樹萱與折麻聞繁鉦之韻冰聽流風之入笳終知客  
遊之阻無解鄉路之賒

還林賦

有序

梁丘遲

爰自京師言歸舊嶺今風古轍每動寸衷因事而書不  
覺成卷非謂為文聊記行途所經云爾

太皞弭節祝融聳駕炎鐘汎響青籥靜吹丘子稅轅畿  
路總舳川濬褫魂故嶺結夢舊墀揆身世而載懷鏡古  
今而興辭驗難停於楊轍昭易改於墨絲匪追舉而辨  
命豈適尹而問著擔簦無白璧之想負書靡黑貂之悲  
纜解山潮首顧京滙仰絳堞之紛迴與素津之容裔荃  
橈往來芰蓋經過依稀子陵之釣髣髴滄浪之歌出入  
風霞游息雲露階迴禽飛憲高月度踟躕七教徘徊五  
禮永翦帶於闕上長緝巾乎林底

將歸賦

唐 歐陽詹

憶求名於薄藝曾十稔以別離纔還鄉以半齡又三年  
於路岐紅顏匪長白日如馳冉冉皆盡悠悠為誰親有  
父母情有閨闈居唯苦飢行加相思加相思兮寧苦飢  
辭家千里兮欲與偕歸南陔之蘭北山之薇一芳一菲  
何是何非歸去來兮秋露霑衣

辭行李賦

陳 江 總

維大梁三十有六載神功懋乎開闢垂恩儲祉壓子代



之盤盂盛德形容陋周年之弇石月窟向風日域仰澤  
要荒欵塞諸戎重譯輜軒巡履聲芳亥步旌節經過事  
高禹跡舉皇華之盡美馳珥玉之多事或江夏之無雙  
匹洛陽之才子訪羽儀於廊廟旌秀異於杞梓引強學  
之三端賞彫文於四始顧德侗於罕志奉朝章於信次  
天鳳舉而張旃濟龍沙而通贊敏異季札之聽歌譽乘  
屬國之銜使懷蘇子之抵掌憶千秋之畫地願自勵而  
飲冰揆無庸而按轡嗟負恩之無力每若寘於叢棘倏

辭東平之樂善再踐承明而游息豈異千里之奔蹏寧  
辭一錢之不直諒無期於鴻漸念有似於蟬翼荷德澤  
之霈然鑒丹愚之匪飾慙借譽於瑟柱免長徭於瑟極  
聊暇日以須臾每長吟以鬱紆異金石之能固若草木  
之分區進學慙於枝葉縣力謝於康衢構伯休之蓬戶  
狎仲憲之桑樞徒悅水而非智庶因谷以為愚恥矯名  
於周客寧濫響於齊竽奉棲遲以偃仰願太素之不污

送君南浦賦

以越空縣目傷  
妾是君為韻

唐  
黃滔

南浦風煙傷心渺然春山厯厯春草繇繇那堪送行客  
起離筵一時之萍梗波濤今朝惜別千里之秦吳燕宋  
何日言旋當其繫馬出船候潮待月低徊而少婦對景  
愴恨而王孫望闕莫不撚嶰竹以淒楚撥湘絃而激越  
且當蘋澗把芳酒以留歡莫被薰風吹片帆而便發君  
不見陌上塵中奔西走東車輪似水馬足如蓬夜泊而  
猿啼霜樹晨征而月在煙空爭得枝間比翼更同於越  
鳥只應波上離羣便逐於燕鴻莫不太苦行人偏傷別

妾龍媒而嘶出金埒鸞扇而持歸玉篋於時莫展歌顰  
全沉笑靨郊天路口愁攀夾渡之柳條採蕨山前忍看  
解維之桂楫是知無人免別有別皆傷使人落顏貌枯  
肺腸淚成雨鬢侵霜朝悲五嶺暮怨三湘夢去不到書  
來豈常況一川之煙景茫茫橫衝楚徼兩岸之風濤渺  
渺直截炎荒無不銷魂如何舉目齊行而寶劍三尺留  
下而明珠十斛林駢樛木推誠而敢望合歡洲躍嘉魚  
取信而當期剖腹及夫樂闋人散龜飛日曛遺鞭却取

解珮還分玉驄之歸步愁舉蘭棹之移聲忍聞須知赤  
帝之江頭兩心似火莫自蒼梧之岸曲一去如雲雖佇  
錦衾而贈我終攜錦字以酬君已而誰不別離別離如  
此誰不相送相送於是則東門與北梁不足云爾

送將歸賦

宋 蔡確

昔人之言秋意也曰若在遠行登山臨水送將歸此其  
平日遊子之所悲怨慕悽愴尚不能自支而況於予乎  
戀高堂之慈愛積三歲之違離余親屬子以侍我行且

復命於庭闈其送子也乃在粵嶺之南溟海之西洗亭  
之側瀘水之濱出門躑躅以將別仰天涕泗之交頤浮  
雲為我變色行路為我齎咨而況於予乎余方省愆念  
咎藿食布衣髮如秋霜形如槁枝子見吾親勿以告之  
明明二聖仁如天也雷霆雨露固有明也孤臣放逐久  
當憐也晨夕定省歸可期也子告吾親其以斯也乎天  
下之險處乎人跡之稀觸氛霧以深入仗忠信而不疑  
以余之故而兩走乎萬里嗟如子者其誰周楚之郊余

親所棲瞻彼白雲子留子馳安得借翰於鴻鵠徑從子而奮飛也

遠行送將歸賦

有序

宋  
陳 普

余寓杭友人楊孔璋告余以先歸賦采薇以見贈讀之駸駸乎不滓矣余因九辯首句適與吾今日之事合遂聊以題吾送別之篇曰遠行送將歸以為采薇之答

芙蓉江邊兮日淒淒暮雲無燕兮南鴈飛飛僚慄兮遠行登山臨水兮送將歸歸兮歸兮何所載兮束書淒涼

以寂寥屈原騷紫陽易兮此何所有嗟意足而氣驕去  
家而泛江湖兮日月半乎歲周東探禹穴兮登秦望而  
窺澈澈笑句踐宇宙狹兮弔蘭亭倉卒為荒丘西涉浙  
湍兮出三吳而見淮山盤龍踞虎石怒角而撐髯兮顧  
甘困卧而摧頽奔淙舂突乎足下兮茲流何日而安安  
北渡烏江兮問項籍何兒女獨夫而爭天下兮螻螳而  
負萬石之鐘簾千金萬戶豈能得汝頭兮上帝之孥戮  
汝兩淮一目千里兮耒耜戢戢不知為誰耕坐城中者



誰兮得無耳塞而目盲柰汝輟鮒何兮遲我不知幾年  
為汝挽西江歷歷山川與古今兮嗟心鬱結而莫舒宇  
宙之大誠足以助吾浩然兮其如煢獨鰥寡之為魚悠  
悠當世之人兮坐厝火而望太虛紛紛爭食之徒兮敝  
衣提蟻與蝨鮑車糾絞乎蟲蛆欲於此而售吾說兮若  
資珍髣懷象摘南鬻斷髮而取贏餘欲於此而容吾足  
兮如衣縫掖表絺綌西之裸國而卜居身既靡所措兮  
匪采薇其焉往嗟予與子同兮子獨歸而我猶海之上

歸理松竹兮收集猿鶴  
朝誦中庸兮夜讀大學  
余將奔若乎其後兮  
期共老乎丘壑

東還賦

唐李觀

我思西來兮猶前日之未賒  
歲迴復兮倏歷五稔如一  
息歟吐嗟我道甚直兮志甚迂  
若陟景之無所涉川之無涯  
今雖非乎乘車如輟除道亦遮乎  
執笏而我之還家我之家兮逼江  
濶而臨海蒞其地則古有吳王之夫  
差十代之風兮但傳乎稽古數畝之宅兮不樹乎桑麻

親之慈兮兄之友與予之弟悌常澣衣而非食吾安得  
以天役役此還之為華乃命僕以詰朝而必上道問何  
有則曰始來之寶力經筭其外則毫末而無加於是乃  
出國門而東驚乃賦其言曰東還兮直書吾意而罔差  
風蒼茫兮候入八月潮上之日西南斜城中之人或持  
酒肉以送我親夫車馳馬顛兮無非別者之為邪繇是  
酒不飲兮肉不御咸回回兮一江而歌苟天下之人兮  
離合之若此矧吾高堂為念之謂何乃三肅而行順彼

長道忘自東南之相遇

南歸賦

明 梁寅

感陽春之方殷兮發孤旅之遐思出都門以曠望兮具  
舟楫而南歸迺迴瞻於帝居兮薄中天之虹霓像紫宮  
以蕉嶢兮貫黃道以逶迤壯麒麟之兀兀兮聳天祿之  
巍巍吾固樂金門之高步兮願參白虎之羣議顧年邁  
而力罷兮迺形瘵而心急麋鹿藏於深林兮鳳鸞集夫  
熙世審物情之既異兮君子盍量其才器虞德隆兮三

禮明漢業建兮朝儀興煌煌乎大明之盛典兮爰稽式  
而告成延搢紳以博諏兮蒐巖穴而旁徵慙齊竽之濫  
列兮愧趙鐸之希聲承賜金之渥恩兮荷錫服之殊榮  
詔許歸而佚老兮循初服以紆情朝發櫂於龍灣兮夕  
余憩夫采石歷曲洲之坡陀兮臨廣隰之泓澤雨浪浪  
而驟響兮雲默默而凝色神魚驤其頽首兮旋鴻馳其  
迅翼嗟吾行之猶滯兮望匡廬而不迫昔余之棲壑兮  
固安夫寥闕也犯波濤以往還兮今何為而役役也呂

望之漁釣兮樹興王之績也甯戚之飯牛兮竟以相國也吾誠不及古之人兮寧守夫窮獨之節也金以利而為劔兮木以直而為楹在治忌夫踴躍兮在山焉能以自呈賢願進而效用兮愚思退而全名或違道以干譽兮寧身困而心亨謂斯言之匪忱兮指江水以為正亂曰楚山礚礚雲溶溶兮返吾故廬不悲不逢兮羞彼齷齪釋忡忡兮涵泳聖澤希淳風兮懷空谷之賢兮賦白駒而從之

傷遠行賦

唐白居易

貞元十五年春吾兄吏於浮梁分微祿以歸養命予負  
米而還鄉出郊野兮愁予夫何道路之茫茫茫茫兮二  
千五百自鄱陽而歸洛陽朝濟乎大江暮登乎高岡山  
有險兮路屈曲甚孟門與太行楓林鬱其百尋涵瘴煙  
之蒼蒼其中闕其無人唯鷓鴣之飛翔水有含沙之毒  
蟲山有當路之虎狼況乎雲雷作而風雨晦忽電靄兮  
不見日陽涉泥濘兮僕夫重脰陟崔嵬兮征馬玄黃步

一步兮不可進獨中路兮傍徨噫昔我往兮春草始芳  
今我來兮秋風其涼獨行踽踽兮惜晝短孤宿煢煢兮  
愁夜長況太夫人抱疾而在堂自我行役諒風夜而憂  
傷惟母念子之心心可測而可量雖割慈而不言終蘊  
結乎中腸曰有弟兮侍左右固就養而無方雖溫清之  
靡闕詎當我之在傍無羽翼以輕舉羨歸雲之飛揚惟  
晝夜與寢食之心曷其弭忘投山館以寓宿夜緜緜而  
未央獨展轉而不寐候東方之晨光雖則驅征車而遵



歸路猶自流鄉淚之浪浪

近遊賦

晉束皙

世有逸民在乎田疇宅彌五畝志狹九州安窮賤於下  
里寔玄淡而無求乘輦輅之偃蹇駕蘭單之疲牛連塹  
索以為鞅結斷梗而作鞦攀輦門而高蹈竭徘徊而近  
遊井則兩家共一園必去舍百步貫雞穀於歲首收雞  
雛於羽互其男女服飾衣裳之制名號詭異隨迭設繫  
襦以御冬質汗衫以當熱帽引四角之縫裙為素條之

殺書兒啼於客堂設杜門以避吏婦皆卿夫子呼父字  
及至三農間隙邁結婚姻老公戴合歡之帽少年著最  
角之中

續遠遊賦

有序

宋  
李綱

屈原作遠遊章句文采瓌麗於騷辭中最為有理致者  
予方以金僊氏之書灑濯其心慨然思往見之作續遠  
遊賦以寓意焉其辭曰

悲塵寰之喧卑兮願遠遊以自適恍形止而心馳兮託

夢魂而有得漠虛靜以無為兮絕氛埃而奔逸登泰山  
以小天下兮望滄溟而笑河伯走蒼梧於南荒兮過崆  
峒於西極忽神馬而尻輿兮歷萬里而一息曾不足以  
慊吾之志兮將往遊於廣漠之國會萬期於須臾兮步  
八紘於咫尺觀天地之所以浮沈兮究日月之所以出  
入爰整吾御兮駕言西之左王良而右伯樂兮服山子  
而驂盜驪陟閭苑於崑崙兮見王母於瑤池聽白雲黃  
竹之歌兮不勝其悲迴車竭來兮巡海之涯聞海中之

神山兮有方丈與蓬萊六鼇舉首以迭戴兮仙聖飛騰而往來泛陵波之巨航兮操五種以自隨風輒引舟而不可到兮怊惝恍而傷懷乘風御氣兮造夫天關抵營室厯閣道兮是為紫微之垣執招搖步瑤光兮瞻太乙肅鈞陳於帝傍玉女投壺而笑兮雷電若以奔騰虎豹守闕而不可入兮雖欲自達而無因悵吾將誰適從兮其惟西方之聖人嚴清淨之佛土兮闢廣大之法門目淨修廣如青蓮兮舌相廣長而無不聞以一音而演說

兮普滋發於諸根寶樹森以行列兮天花散而繽紛菩  
薩聲聞環以圍繞兮天龍八部儼以威神倏一念而往  
詣兮稽首禮足而欽承俾化人以導予兮游華藏於無  
垠從一佛國至一佛國兮若河沙與微塵咸廣博而嚴  
淨兮羌難得而備云迴視五濁惡世之衆生兮若一器  
之聚螽蟴驚悟而永歎兮何所夢之明明覽六合而遊  
十方兮曾弗離乎一身惟茲方寸兮漫然無際含容大  
千兮山河大地用之以小兮始有分劑如以大海納於

蹄涔兮如以毒藥置於寶器舍無價之寶珠兮競錐刀  
之末利棄瀛渤之全潮兮認浮漚之微體蠻觸國於蝸  
角兮時相與戰而流血千里南柯夢於蟻穴兮黃梁未  
熟而榮華一世彼區區之利害兮亦與此而何異惟還  
觀而照寂兮廓靈府於無外泯六鑿於天游兮其孰能  
以芥蒂絲發心以証道兮可一起而已至吾方從事於  
斯兮等浮生於一戲

遠遊賦

有序

明  
袁 袞

余弱冠登朝讀書中秘繼官刑曹調武選武庫災編戍  
湖州赦歸蒙薦起為南武選遷職方署員外郎尋有廣  
西之命昔孔子欲居九夷不以為陋廣西古百粵也今  
海內同軌且余既仕矣安敢以遠辭乎爰作遠遊賦以  
述事抒情焉其辭曰

沐鴻私於嘉運兮擢遺側於樊丘曳華綏以登進兮踐  
舊京而嬉遊幸朝野之無事兮肆驩虞而靡憂謝文墨  
之填委兮稽圖牒以諮搜差穀旦以休息兮爰嘯侶以

集儔升北山以遐眺兮溯大江而榜舟或閱武於廣場  
兮或被楔於清流尋廢興於六代兮仰駿業於皇猷念  
無荒之有戒兮信佚樂而不偷乏佐時之奇略兮竟投  
裔於僻陬駭顏駟之龐眉兮怪馮唐之白首歎滯淹於  
更生兮笑浮沉之楊叟羞子安之巧宦兮蒙良史之譏  
醜偉潘仁之拙政兮賦閒居而不朽衆捷徑以窘步兮  
固余顏之所厚獨修姱以委順兮諒余心之所取苟貪  
婪以競進兮寧坎壈以自守昔孔聖之周流兮居九夷



而弗陋羌下惠之直道兮遭三黜而無咎顧樗櫟之非  
材兮雖棄捐其何有奉簡書以畏忌兮戒僕夫而啓行  
出槁李之下邑兮遊臨安之故城痛越霸既不終兮宋  
社又以圯崩肅陽侯以先驅兮遵淞水以揚舲感錢鏐  
之雄武兮提尺劔以縱橫悼伍胥之忠憤兮浮鴟夷以  
殞身忽怒濤之山立兮儼白馬以耀靈沿桐江以容與  
兮憩嚴瀨之澄清躡高臺以長嘯兮懷哲人之典型於  
是芳歲將徂玄冬告畢雨濛濛其下淫兮雪霏霏以蕭

瑟瑟霧曠以冥冥兮同雲暖其無色鴈雖離而南翔兮  
日忽忽其西匿坐修夜之難旦兮步列星以太息繹甯  
越之曩歌兮材士顧領而失職心佗傺以紆軫兮思結  
結而瞀惑水泉涸其不流兮石巉巖而阻塞既儻徊以  
川浮兮復崎嶇而山陟野蕭條而無人兮獸躑躅以屏  
跡愁車殆而馬煩兮汨吾朝征而夕于役形枯槁以渴  
饑兮精消鑠而內蝕魂涸養以踰佚兮涕浪浪而霑臆  
撫壯年之不居兮恥修名之未立於是歷甌粵觀豫章

攀傑閣於江渚兮詠瑋辭以傍徨帝子不可作兮王生  
亦已淪亡睇彭蠡之巨浸兮追鴻伐於高皇想湖水之  
盡赤兮殪元兇於大黃翦鯨鯢於溟渤兮陋鉅鹿與昆  
陽謁羣忠於叢祠兮覩丹青之耿光甄孫許之壯烈兮  
實後先以相望咸致命以竭節兮終身滅以名揚越臨  
江以信宿兮矚玉筍之崇岡侈降禪於漢武兮欽登封  
之閔藏忽獻歲以發春兮迴青陽於幽谷鳥嚶鳴其相  
和兮麗冬榮之嘉木悲去鄉其日遠兮時反顧以蜷局

子牟皇皇以戀闕兮嗣宗途窮而慟哭何賢哲之達觀  
兮猶委心於榮辱諷龍蛇之至言兮勵浮雲以自勗聳  
韓廟於袁疆兮哀逢辰之不淑黜百家以述聖兮排二  
氏以箴俗雖馴鱷以開雲兮卒罹殃而貶逐弔楚纍於  
江潭兮披騷經而三復椒蘭妒而構讒兮嫉蛾眉而謠  
詠怨靈修之不化兮傷郢都之傾覆式彭咸以自靖兮  
葬汨羅之魚腹涉長沙以風駕兮嗟賈生之天年遭漢  
文之殊遇兮何卒困乎絳灌之巧言闢宣室以徒召兮

賦鵬鳥而自憐挺異才以命世兮竟齎志於重泉亂衡  
陽之洪河兮厲沅湘之大川覽吳楚之上游兮極耳目  
之偉觀瞻柳侯於永郊兮薦繁蔭以羞筵世溷濁而壅  
塞兮紛妒忌以蔽賢慨四子之一轍兮羌異代而同患  
士不遇以永歎兮諒自古而已然望朱垠以儆裝兮指  
象郡而驟軌肆流目於九疑兮悵重華之野死蒼梧曼  
曼以在望兮悼二妃於江之汜山龍從以造天兮嵐昏  
昏而晝起桂樹叢生於巖阿兮春炎炎其若暑壤濱海

以沮泓兮土墊濕而恒雨猥獠娛以同人兮咸雕題而  
黑齒蝮蛇蓁蓁於中林兮或含沙於淵水雄虺九首以  
齧齧兮封狐捷而千里何此邦之炎瘴兮固蠻族之所  
止徵禹跡之所不到兮檢職方而未序訖漢帝之喜功  
兮肇開拓而疆理猗皇風之泰昌兮界昆吾以為宇包  
五嶺以作藩兮括百粵以置吏朝越裳以重譯兮撫交  
州而即叙眇余躬之陋微兮敷文教於茲隅戾泮宮以  
振鐸兮選青衿之秀儒懼聖遠而言湮兮病曲學之支

離列四科以作人兮愧五教之未施憑丘墳以頤志兮  
寄絃歌以自娛聞老聃之適戎兮講道德之玄虛蒙莊  
遁於漆園兮馳放言以咨睢虞卿窮而亡聊兮猶發憤  
以著書苟斯文之未喪兮竊希志於前規吾將寵今古  
以騁驚兮掇罔象之玄珠亂曰去鄉遠遊心不樂兮自  
冬徂春將焉薄兮炎州卑濕風土惡兮魑魅晝出瘴癘  
作兮狐死首丘不忘故兮代馬北風尚知慕兮世不我  
知羌誰愬兮歸兮歸兮娛竹素兮

戎旅賦

明楊慎

恭承恩譴兮于役滇越捐珮江皋兮解紳雲闕三陟崔  
崔兮九折黜黜不日不月兮遂屈窮髮撫孤旅而惛眩  
兮拚衆困而慙心悵圭齋之駁遄兮逾四稔而迄今父  
母孔遠兮懿親離而北南類連達而分衢兮似同波而  
殊潯慈烏忻於共巢兮恒鳥悲乎異林彼纖羽之微族  
兮亦命侶而跼蹐何生人之含靈兮乃離羣而弗如詠  
清人之介駟兮感放士之鳴鵠姬公畏於熠燿兮尼父



喙夫螭蜺屈托乘於螭豹兮莊寄徑於鼪鼯在聖哲而  
固然兮攬古人而重歎哀吾生之惟郵兮背中土而播  
荒粵戴盆而伏堪兮望崦嵫之末光神怳悵而蜚颺兮  
形嚮卷而僖囊睇孫水之浩渺兮瞻靈關之峻極聆猩  
猩之夜啼兮履狒狒之朝跡尋終古之攸居兮問祝融  
之昔宅胥靡登而不懼兮魑魅過而奚慄堀堞颺揚兮  
含沙影流喟茲徂春兮忽焉杪秋月令殊於九州兮瘴  
卉華而歲周若有人兮好我攜旨酒兮思柔采檳榔兮

綴扶留贈相離兮結忘憂寒鶉雞兮為脯露江魚兮為脩瀣歌兮棘舞白日逝兮玄景浮獨持觴而懷遠兮雜歎嘯其向隅遂還軫而休室兮隱零雨乎寂夜引簟枕而假寐兮遙夢歸乎親舍家人嘻以款語兮閭里紛其來訝衆雞鳴而驚余兮晨光昉乎東射悵夢歡而覺悲兮淚承睫而交下假靈氛以厯占兮援龜頌兮余謝曰明庭其布德兮子行歸乎肆赦系曰莫靡荒服自中古兮日月之表燭不普兮章亥步窮禹罔覩兮蘭津開道

行商苦兮碧雞望祭使者阻兮余亦何為恒此土兮金  
躍不祥順勿忤兮樂天知命去何憊兮

適吳賦

漢  
梁鴻

逝舊邦兮遐征將遙集兮東南心愴怛兮傷悴志菲菲  
兮升降欲乘策兮縱邁疾吾俗兮作讒競舉枉兮措直  
咸先佞兮哢哢固靡慙兮獨建冀異州兮尚賢聊逍遙  
兮遨嬉纘仲尼兮周流儻云覩兮我悅遂舍車兮即浮  
過季札兮延陵求魯連兮海隅雖不察兮光貌幸神靈

金史四庫全書 卷十  
兮與休惟季春兮華阜麥含含兮方秀哀茂時兮逾邁  
愍芳香兮日臭悼吾心兮不獲長委結兮焉究口囁囁  
兮余訕嗟恇恇兮誰留

秋夜七里灘聞漁歌賦

以明月白露光  
陰往來為韻

唐

王 棨

七里灘急三秋夜清泊桂棹於遙岸聞漁歌之數聲臨  
風斷續隔水分明初擊楫以興詞人人駭耳既艤舟而  
度曲處處含情衆籟微收濃煙乍歇屏開兩面之境壁  
碎中流之月逃名浪跡始蕩槳以徐來咀徵含商俄扣

舳而迴發一水喧阗旁連釣臺羣鳥皆息孤猿罷哀激  
浪不停高唱而時時過去涼颼暗起清音而一一吹來  
潺潺兮跳波激射歷歷兮新聲不隔初聞而彌覺神清  
再聽而惟憂鬢白遠而察也調且異於吳歌近以觀之  
人又非其郢客杳裊悠揚深山夜長殊採菱於鏡水同  
鼓枻於滄浪泛濫扁舟逸興無慚於范蠡沉浮芳餌高  
情不減於嚴光況其岸簇千艘巖森萬樹湍奔如雪之  
浪衣裊如珠之露寂凝思以側聆悄無言而相顧此時

遊子只添岐路之愁何處逸人頓起江湖之趣由是寥  
亮清潯良宵漸深引鄉淚於天末動離魂於水陰究彼  
嚙喉似感無為之化察其鼓腹因知樂業之心既而暗  
卷纖綸潛收密網灘頭而猶唱殘曲水際而尚聞餘響  
漁人歌罷今天已明掛輕帆而俱往

秋風吹汝水賦

宋 范純仁

歲作噩之窮秋兮策羸驂而獨征嗟旅懷之羈憤兮感  
時律之崢嶸遵汝流之縈紆兮背高峰之翠橫號霜風

之僚慄兮肅天地而淒清獵葭葦於晚岸兮雜紅翠之  
搖旌脫林實於沙際兮浮瑣碎之秀瑩激回流之平迴  
兮蹙綃文之細輕涵夕照之演漾兮蕩澄潭之空明促  
東逝之滔滔兮方感慨於余行縻王事以去留兮跡未  
安而遽更佩主人之眷勤兮服友生之意誠何會合之  
難久兮特離憂之易并儻丘園之可服兮將就濯其塵  
纓臻聖賢以相期兮惟道義之是營苟沒身以無愧兮  
亦奚事於成名

桂林中秋賦

有序

宋 范成大

乾道癸巳中秋湘南樓月色佳甚病起不觴客又祈雨  
蔬食清坐默數年來九遇此夕皆不常其處乙酉值三  
館丙戌與嚴子文游松江有來歲復會之約丁亥又以  
薄遽走陽羨與周子充遇於罨畫溪上戊子守括蒼已  
丑以經筵內宿庚寅使虜次於睢陽辛卯出西掖泊舟  
吳興門外壬辰始歸石湖而今復踰嶺歎此生之役役  
次其事而賦之



登湘南以獨夜兮挹訾洲之橫煙絳霄豔其光景兮湧  
冰鏡於蒼巔悵吳宇之佳節兮并四者其良難矧吾生  
之漂泊兮寄遽廬於八埏九得秋而九徙兮靡一枝之  
能安上瀛洲而瀑飲兮當作靈之初元旋水宿於垂虹  
兮滉金碧之浮天剋後期而竟爽兮忽罨畫之滄灣既  
戊子而守括兮摘少微於樓欄丑寓直於玉堂兮聽宮  
漏之清圓再西風而北征兮胡笳咽於夜闌迨返旆之  
期月兮放苕雪之歸船幸故歲之還吳兮帶夕暉而濯

園甘土偶之遇雨兮就一丘而考槃今又飄飄而桂海  
兮賓望舒於南躔訪農圃之昨夢兮杳征路之二千月  
亦隨予而四方兮不擇地而嬋娟諒素娥之我咎兮老  
塵浣於朱顏澄觀月之曩見兮炯不動而超然適病餘  
而閉閣兮屏危柱與哀絃復訟風而閔雨兮謝鼎食之  
芳鮮闌清齋而晤歎兮驚足迹之間闕誰職為此驅逐  
兮豈不坐夫微官知明年之何處兮莞一笑而無眠

渡瀘賦

明  
何景明


晨瞻崇丘鬱乎相裛局以水峽隱以大洲沙莽寒日江  
深夕流蓋將濟於瀘水傍人告予以理舟汎洪波以直  
渡迎迴颺於上游顧中原而緬邈久西域以滯留感逆  
旅之長勤懷古人而增憂想夫漢炎既燼蜀都始家區  
土未闢士馬不加深入五溪橫制三巴冒險通塞柔邇  
來遐收羌髡以帶甲率庸廬而習戈捷吳權之堅銳摧  
魏懿之精華今其斷岸遺津寂寥水涯苦霧縈石悲風  
振沙音塵淪絕古今長嗟歎餘風兮莫覲幸故址兮重

過西望開創之基形勢蒼蒼襟夔府而控荆門峙巫峽  
而流瞿塘簡書零落陣圖縱橫煙磧下月陰岸積霜風  
雲慘而猶憤魚鳥畏而將翔功雖隕而譽遠身既沒而  
國亡南瞻祠廟巍兮敞宏松柏陰戶丹青閟宮垣胷林  
蔓階卷寒蓬亦徒嘻吁父老涕淚英雄而已嗚呼當其  
長嘯之後三顧之餘氣感雲龍恩同水魚念季葉之否  
運思中興之遠謨偉雄並乎三分恥偏安於一隅何遂  
違其懿志竟弗騁其長驅吾哀斯人遭時不淑宜三代

以翱翔胡羣姦而馳逐矧功業兮難成且年歲兮易促  
嗟哉天道高不可摩得志者寡失意恒多苟道之不行  
雖孔孟其如何泛泛吾舟載揚其波艤彼清潯陟彼中  
阿無人可邀聊獨行歌歌曰朔風起兮渡水寒扣櫂中  
流兮懷昔賢遇非其時兮良獨艱嗟嗟遇非其時兮良  
獨艱



御定歷代賦彙外集卷十



總校官庶吉士臣張能照

校對官編修臣楊壽楠

謄錄監生臣阮坦

欽定四庫全書薈要

集部

御定歷代賦彙外集卷十一



御定歷代賦彙外集卷十一

曠達

大人賦

漢司馬相如

維漢世有大人

今在乎中州宅彌萬里今曾不足以少留悲

世俗之迫隘兮竭輕舉而遠遊乘絳幡之素蜺兮載雲  
氣而上浮建格澤之修竿兮總光耀之采旄垂旬始以  
為慘兮曳彗星而為髻掉指橋以偃蹇兮又猗昵以招

搖檻橈槍以為旌兮靡屈虹而為綢紅杳眇以玄濬兮  
裁風涌而雲浮駕應龍象輿之螭略委麗兮驂赤螭青  
蚪之蚪蟠宛蜒低印天矯裾以驕驚兮詘折隆穹躍以  
連卷沛艾起蜺仡以佻儼兮放散畔岬驤以孱顏跼蹐  
輻輳容以翫麗兮蜩蟬偃蹇怵爰以梁倚糾蓼叫梟踏  
以般路兮蔑蒙踴躍騰而狂趨莅颯蒨歛焱至電過兮  
煥然霧除霍然雲消邪絕少陽而登太陰兮與真人乎  
相求互折窈窕以右轉兮橫厲飛泉以正東悉徵靈囿

而選之兮部署衆神於搖光使五帝先導兮反太一而  
從陵陽左玄冥而右黔雷兮前長離而後裔皇廝征伯  
僑而役羨門兮詔岐伯使尚方祝融警而蹕御兮清氣  
氛而后行屯余車其萬乘兮綵雲蓋而樹華旂使句芒  
其將行兮吾欲往乎南娛歷唐堯於崇山兮過虞舜於  
九疑紛湛湛其差錯兮離還膠輅以方馳騷擾衝從其  
相紛拏兮滂濞決軋麗以林離攢羅列聚叢以龍茸兮  
衍曼流爛彥以陸離徑入雷室之硤礚鬱律兮洞出鬼

谷之堀畧歲魁偏覽八紘而觀四海兮竭度九江越五  
河經營炎火而浮弱水兮杭絕浮渚涉流沙奄息蔥極  
汜濫水涘兮使靈媧鼓琴而舞馮夷時若曖曖將溷濁  
兮召屏翳誅風伯刑雨師西望崑崙之輶沕荒忽兮直  
徑馳乎三危排閭闔而入帝宮兮載玉女而與之歸登  
閼風而遙集兮亢鳥騰而壹止低徊陰山翔以紆曲兮  
吾乃今日覩西王母皜然白首戴勝而穴處兮亦幸有  
三足鳥為之使必長生若此而不死兮雖濟萬世不足

以喜回車竭來兮絕道不周會食幽都呼吸沆瀣兮餐  
朝霞咀嚙芝英兮噉瓊華傑祲尋而高縱兮紛鴻溶而  
上厲貫列缺之倒景兮涉豐隆之滂濞騁遊道而修降  
兮騫遺霧而遠逝迫區中之隘陝兮舒節出乎北垠遺  
屯騎於玄闕兮軼先驅於寒門下崢嶸而無地兮上嶮  
廓而無天眎眩泯而亡見兮聽愴怳而無聞乘虛亡而  
上遐兮超無友而獨存

嘉遜賦

晉孫承

有嘉遯之玄人含貞光之凱邁靡薛荔於苑柳蔭翠葉  
之雲蓋揮修綸於洄瀾臨崢嶸而式墜汴清風以長嘯  
詠九韶而忘味若乃御有撫生應物宅心曜華春圃凋  
葉秋林振藻陽波清景玄陰形猶豫以徙倚神曠寂而  
難尋渾無名於域外和丘中以草音於是混心齊物遨  
翔容與薄言采薇收蘿中野朝觀美陸夕步蘭渚仰弋  
鳴鴈俯釣魴鱖遊無方之內居無形之域詠休遁之貞  
亨察天心而觀復委性命於玄芒任吉凶而靡錄

應嘉賦

有序

晉陸機

友人有作嘉遜賦與余者作賦應之號曰應嘉云

傲世公子體逸懷遐意邈澄霄神爽靜波仰羣軌以遙  
企頓駿羽以婆娑寄冲氣於大象解心累於世羅襲三  
閭之奇服詠南榮之清謠濯下泉於浚澗泝凱風於卷  
阿指千秋以厲響俟寂寞之來和懷前修之髣髴覲幽  
人乎所過抱玄景以獨寐含清風而寤語發蘭音以清  
唱操玉懷而喻予於是葺宇中陵築室河曲軌絕千途

而門瞻百族假妙道以達觀考賁龜而貞卜苟形骸之  
可忘豈投簪其必谷方介立於尺阜託雲林乎一木佇  
鳴條以招風聆哀音其如玉窮覽物以盡齒將弭迹於  
餘足

逸民賦

晉  
陸雲

富與貴人之所欲也而古之逸民或輕天下細萬物而  
欲專一丘之歡擅一壑之美豈不以身勝於宇宙而心  
恬於紛華者哉故天地不易其樂萬物不干其心然後



可以妙有生之極享無疆之休也乃為賦云

世有逸民兮棲遲於一丘委天形之外心兮澹浩然其  
何求陋此世之險隘兮又安足以盤遊杖屨策而遂往  
兮乃枕石而漱流載營抱魄懷元服一傲物思寧妙世  
自逸靜芬響於永言滅絕景於無質相荒土而卜居度  
山阿而考室曾丘翁薈穹谷重深叢木振穎葛藟垂陰  
潛魚泳沚嚶鳥來吟仍蔬圃於芝薄兮即蘭堂於芳林  
靡炎飈以赴節兮揮天籟而興音假樂器於神造兮詠

幽人於鳴琴挹迴源於別沼兮餐秋菊於高岑蒙玉泉  
以濯髮兮臨濬谷而投簪寂然尸居儼焉山立遵渚龍  
見在林鳳戢遁縣野以宅心望空巖而凱入明發寤歌  
有懷在昔賓濮水之清淵兮儀礪溪之一壑毒萬物之  
誼譁兮聊漁釣於此澤爾乃薄言容與式宴盤桓朝挹  
芳露夕翫幽蘭眇區外而放志兮眷天路而怡顏望靈  
嶽之清景兮想佳人於雲端悲滄浪之濁波兮詠芳池  
之清瀾鄙終南之辱節兮遵伯陽之考槃晒清霄以寄

傲兮泝臨風而顛嘆玄微載晏何思何欲漂若行雲之  
浮泊若窮林之木咨有得之必喪兮蓋怙寵之召辱彼  
貪夫之死權兮固遺生以要祿竦戰兢而履冰兮祇肅  
懷以臨谷亮據鼎之無慄兮在顛沛其必渥是故形瑰  
者徵咎體壯者為犧雖文明而龍藻兮終俛首而受羈  
立修名於禍始兮登全生於戾階資朝華之促節兮抱  
千載之長懷擠考終於遠期兮顛靈根而自摧殉有喪  
之假樂兮彼無身其孰哀美達人之玄覽兮邈藏器於

無為物有自遺道無不可萬殊有同齊物無寡並家於  
國等朝於野榮在世而貴身兮神居形而忘我欽妙古  
之達言兮信懷莊而悅賈曾既明於天爵兮何暇悲於  
人禍陋國風之皇恤同明哲於大雅亂曰乘白駒兮皎  
皎遊穹谷兮藹藹尋峻路兮崢嶸臨芳水兮悠喬槃丘  
園兮暇豫翳翠葉兮重蓋瞻洪崖兮清輝紛容與兮雲  
際欲凌霄兮從之恨天地兮未泰詠歡友兮清唱和爾  
音兮此世

玄虛公子賦

梁簡文帝

有玄虛之公子輕滅喧俗保此大愚居榮利而不染豈  
聲色而能拘迴還四始出入三墳心溶溶於玄境意飄  
飄於白雲追寂圃而逍遙任文林而佚宕忘情於物我  
之表縱志於有無之上不為山而自高不為海而彌廣

逸人賦

唐  
吳筠

粵真隱先生者體曠容寂神清氣冲迴出塵表深觀化  
宗偃太和之室詠玄古之風收人之所不寶棄人之所

必崇以道德為林圃永逍遙於其中有翫世公子思發  
其蒙乃詣先生之所舍詢出處之異同於是稽首跪而  
稱曰僕聞士之生也備百行榮九德靜為物軌動為人  
則可見故不隱可言故無默使上叶唐虞之化下安仁  
壽之域既兩儀交泰九有不攜然後分人之土執人之  
珪故伊尹負鼎而去有莘太公釋釣而出磻溪朝淪滂  
泥夕升丹梯若喬木之集鵠鳳清流之躍鳧鷖何必矯  
抗斯慕中和見睽躡跡巢許追蹤夷齊膏屯於骨肉和

勦於昨黎捐坦蕩之修衢履幽廢之荒蹊漱寒泉之冷  
泠藉青草之萋萋悲林風之夕振厭山鳥之晨啼始支  
離而餒息終攀卷而寒棲信行藏之足驗唯名實之可  
稽願一聞其至言俾向方而不迷也先生字合寥天心  
凝帝先泯禍福之境杜樞機之權將有言而中止不得  
已而應焉曰夫洪荒之際物靡艱阻上如崇丘下若平  
楚高卑定位各暢其所賢愚同條智詐罔舉孰為出孰  
為處孰為默孰為語迨乎時遷樸散質變淳訛升沈異

躅明暗殊科剛柔相軋曲直相摩或貪餌以吞鉤或橫  
飛以觸羅惟皇王之愍俗爰拯溺於洪波乃自揖讓迄  
於干戈雖政教之異宜誠法令之滋多欲遏亂以求理  
譬招風而靜柯遂飾禮以邀敬修樂以導和雖聖哲之  
區區卒傾頽而奈何於是上有淫君下彰忠臣龍逢之  
列萇弘之倫苟徇義以成名竟違天而殺身祇足以增  
惡聲於暗主竭惠澤於生民故全德之士韜精保真悟  
歷數之在運知存亡之匪人將扶危而翼顛猶一髮之



擢千鈞塊壤之壅長津所以守嘉遯之元吉從少微之  
隱淪於是洪崖廣成肇其端子州善卷緒其後汾水見  
傲帝之賓潁陽聞洗耳之叟以鴻名為糟粕以大寶為  
塵垢情蠲於取舍意適於林藪不剗心而無慾非吐納  
以永壽眄江河為畎澮謂嵩岱為培塿故天子不可得  
而臣諸侯安可得而友豈作者之唯艱誠歷世而可久  
莫不道貫通於古今跡無繫於奇偶鎮末代之偽薄使  
向風而歸厚若乃子高之規夏禹臧叟之誨周文仲連

之却秦師干木之蕃魏君弦高俯仰以成績四皓從容  
以立勲初混世以表用竟超然而絕羣既抗志於青霞  
聿棲身於白雲茲乃無封滯於萬物時撫俗以解紛者  
矣若乃顧推讓有泰山之重視富貴若鴻毛之輕則孤  
竹之子王季之兄甘食薇於首陽之下悅採藥於句吳  
之垌柱史歸周而道聞關尹去職而真成晨門藏名於  
抱關沮溺避世而耦耕漢陰抱甕以忘機漁父乘流而  
濯纓於陵灌園以逃相萊氏負戴以辭卿南華漆園以

寓跡列子鄭圃以消聲楚狂隱晦蜀嚴湛冥丞相推堂  
於蓋公廷尉結轍於王生故文景尊黃老之術國既富  
而刑清季主卜筮以訓俗文通訟田以穢名顏闔鑿坏  
以避聘伯休潛遊以脫榮龐公課妻以耘鉏嚴光拂衣  
於帝庭啓期三樂以達意梁鴻五噫以抒情尚子平之  
持操畢婚娶以長往許叔玄之守節遺伉儷以遐征聽  
蘇門之詠嘯若鸞鳳之和鳴見夏統之長歌歛雲飛而  
雪零至於焦光瞿硎郭文董京天機符於太素淵默會

於真精寂爾無悶則子真仲蔚確乎不拔有臺佟管寧  
或琴書以自娛或澹漠以無營此則同人者體貌異人  
者神明抱不易之純粹含自然之孤貞道取怡於閒放  
業故無於屯平曉物理之尚簡知天道之惡盈彼鴻飛  
寥廓奚弋者之能榮故寵章焉得而見累悔吝何由而  
相傾哉爾其陰德密庸玄功潛著不感其所毀不欣其  
所譽為無為以成性事無事以澹慮洞希夷之可察涉  
恍惚而斯據托松涓以結友忽駕景而飛去茲乃隱道

其誰能測無何鄉之處乎是以朝廷之士一入而不出  
山林之客宜往而勿還若沽名於白賁銜跡於青山覲  
蒲輪於谷口希束帛於雲闕非巖泉之養正實丘壑之  
藏姦繫末世之鄙薄曷清流之可攀或因茲以幸達詎  
不蘊終身之厚顏矣夫徵福之萌禍胎祈昌之結衰根  
故不韋之識奇貨獻孕妻以密言呂公之辨龍顏謀納  
女以永尊計克從而事捷排天路以騰翻遽變生而殃  
構招釁罰以鍾門霍氏之翼三后謂伊周之復存何赫

奕於當時亟殄殲其子孫鑒興亡之體勢實異代而同  
源已覆敗於前車又傾摧於後轅秦肆坑儒之毒漢流  
黨錮之冤衆君子欲修名顯著乃貽戚於瑩魂仰天居  
之悠迴誰克叩於帝閭固知祥風依於蓬華沴氣襲於  
華軒吾方將反汗漫師玄元黜生死同乾坤當愈幽憂  
之疾所以秉斯道而彌敦也先生之言既畢公子拜首  
而謝曰小子久耽淺近之常議幸沐精微之奧論可謂  
滌除遺滓披拂重昏願凜雪其形神以遊夫子之末藩

而已矣

大隱賦

有序

唐  
皇甫松

樂子進不能強仕以圖榮退不能力耕以自給上不能  
放身雲壑下不能投跡塵埃似智似愚人莫之識也如  
狂如懦物不可知焉酒泛中山適逢千日萍漂上國迨  
逾十年遨遊不出於醉鄉居處自同於愚谷閔仲叔之  
殊見徒避楮肝屈大夫之褊懷浪投魚腹是以坐成滌  
器行將賃舂擁萬卷而笑百城舉簞瓢而歌一室必期

口無二價居賣藥之流身抗三旌入屠羊之肆於是詩  
輕招隱賦陋歸田和光同塵嘗聞語矣邈世無悶豈虛  
言哉榮啓期之鼓琴身終三樂嚴君平之賣卜日止百  
錢是可以融神保和含道詠德亦何必拂衣丹嶠散髮  
清流吸玉露之英蘋金芝之秀鍊神化骨以為榮乎甚  
不然也何況華裾飛蓋鑿玉拖金赫赫煌煌光寵相耀  
有是夫哉昔尚長設論富不如貧曹劌立言食肉者鄙  
請事斯語以奉周旋以書於紳以銘於座河上公之章



句紛其曠歟漢陰叟之畦町不亦勞也言而不足聊為賦云蕪音適愧乎彫蟲浪跡遽同乎豹隱陋均傖父誠堪覆瓿以增嗤價重兼金未足披沙而見擇

有招隱謂樂子曰爾其賢乎何惜惜之如是也樂子喑然招隱者曰夫天地陰陽專其神日月星辰專其耀山嶽峰巒專其高江海川瀆專其深所以滄茫曠朗巍巍瀾瀾者也殆非口適所能彩發於其間矣自此以降各專其能衆自煩也龍專其靈虎專其猛火專其烈水專

其柔靄靈專其怒魑魅專其怪至堯專於治民舜專於  
治孝夏禹專於治水成湯專於救旱周公專於接賢仲  
尼專於化物老聃專於道德莊子專於逍遙迨於史魚  
伯宗專於直也季札專於信也侯嬴荆軻專於義  
也子胥晁錯專於忠也龜鼉魚豚螭龍龜蜃專於水也  
麋麋麋鹿狐狸熊羆專於山也飛鼠專於暗矣飛蛾專  
於明矣至於蜘蛛蟋蟀螳螂蜂蟬皆有所專而未能暫  
忘其所專也觀爾之志退非專閑進非專仕愚不專愚

智不專智操心若老成謀身若兒戲顛倒上下罔識所謂亦有專之者乎樂子曰有之吾專於不專也招隱於是知其大人也斂手易容退而復拜拜而且跪言曰昔仲尼所謂走獸可羅淵魚可緝飛鳥可罾至於龍駕風電乘雲雷吾不知之今先生之謂矣請從而書之於是樂子迺推琴濡毫以訖其辭邈乎悠哉曠宇宙而氛埃古茫茫而日去今紛紛而月來開闢天地之上聖分裂山河之雄材蛇身虎鼻螭質龍胎乘剛柔於水火含變

化於風雷莫不隨草莽而共腐與珠玉而同灰悲夫自  
茲以降又何營營而不迴所以八荒放志六合遊神皓  
然矯首兀若無身顧不懼於來者又何希於古人老聃  
煩於論德釋氏詭以推因苟吾心卓然而不惑又寧見  
欺於此君何況駕鶴真人吹笙王子玉樹玲瓏金臺遷  
遙青鸞翠鳳之飛鳴丹豹赤麟之遊止劉安雞犬呂恭  
奴婢子英拜而魚飛初平叱而羊起或者煮藥而鍼龍或  
飛符而繫鬼負柴草而廣施賭菜瓜而博戲紛乎哉故

吾不悉心而信矣又有青龍上漢白鹿凌虛變砂神米  
質酒靈書吁稚川與子政何相欺之甚歟赤城玄圃任  
公子之所居荒垣朽竹丁令威之故墟安用翩翩為白  
鶴何必悠悠騎碧驢已焉哉吾將居常待終而已矣又  
何神仙之學乎於是掩蓬扃閉茅屋几案詩書形骸土  
木雖捉襟而露肘終擊壤而鼓腹有酒劉伶無妻犢牧  
花菲菲而晚紅草淒淒而暮綠春水兩派晴山數曲吟  
四首以愁濃舉一觴而歡足波激越而瀛溶竹含煙而

樸藪倚杖則手放青鳩脫冠則髮辭斑鹿養牛不乘生  
雞嬾祝苟求仁而得仁又何榮而何欲世事紛紛生涯  
促促亦何為乎鯁金亦何為乎泣玉悠哉已矣胡不順  
時而從俗邪亦有居陋巷而易志顧好爵而迴腸恥白  
屋之蕭瑟期青雲之頡頏寵崇朱紫譽謁馨香交親翁  
而相會門巷煜而生光危冠岌岌環珮鏘鏘朝朱門而  
受爵暮赤族以罹殃信刑漢朝胥流吳水一室薰而香  
焚三穴空而犬死能守節以保身然後謂之君子萬古

勲庸逐風砂歌鐘玉帛散朝霞華亭晉陸悲朱頂上蔡  
李斯憶素牙嵇康臨刑而顧影竇嬰就戮而興嗟高鹿  
馬以喪國范蛇豕而忘家諒覆車之在眼吾將易轍而  
止邪於是振遐思蕩清慮擺簪裾遜名譽聊疎放以安  
貧冀靜僻而為趣迺步重水常趨遙林奇峰危壩古木  
森沈泉出山而漸淺雲入洞而愈深遇清風而藉席對  
綠篠以開襟垂蘿篠裊以樛結連巒菌蠢而相尋望去  
鶴於沙尾見歸龍於水心青苔潤而饒露碧梧欹而足

陰松脂滴酒樹癭臺琴山席平鋪而葉墜書卷橫開而  
露侵迴首遙望松蘿漠漠曲徑抱雲根斜陽遶山脚瀑  
迸疑懸峰危欲落歷斷岫而崢嶸入疎林而綺錯委葉  
交扶盤根相閣野鼠闕於林梢山雞鳴於叢薄蔓韌時  
縈壁危或拓出入煙蘿徧荆寒廊靈葩露葉芳繇繇山  
青雲白心悠然徐生赴哭三千里萊子留書十四篇陸  
通避楚而負醵張翰辭吳而解船豈求聞而矯俗諒襟  
懷之異焉予亦何人思為逸民朝常擁耒暮或垂綸山



泉鳴而入夜洞花寒而變春閑遊諳野蔬食慣貧盤中  
之周生紫蓼嶺上之陶公白雲野岸波澄蓬門露曉排  
徊綠水之際蕭洒青林之表杞根成狗蘿葉垂鳶山鹿  
奔而草低野鶴飛而桂裊溪外負薪田中荷蓀鶉披子  
夏之衣蛙鳴稚圭之沼壠畝連延桑麻繞繚入崦而朽  
竹芟疎出溪而茅茨稀少依林壑以終焉經沼沚而留  
連花披籬而縣絡瀑鳴山而布懸潭中則鱣魚躍日洞  
裏則沈鹿叫煙遇山客以停杖逢沙鳥而駐船槎崩水

沒樹空籬穿雉雉霧旦壘鳴雨天灌於陵之樂園耕彭  
澤之黍田偷閑散於一日役筋骸於百年開山決水澆  
蘭時並移風桂於嶺頭種煙篁於澗裏浪滿沈舟苔生  
濕地山廩空而鼠喧野浪高而鷗喜或曲岸而流觴或  
平崖而隱几煙霞繚繞松桂邈迤踰鶴西來驚鷺南起  
始嶮嶮之不極終溟濛而未已慨然懷古中心如醉憶  
耽酒之步兵想能詩之都尉先生則五斗成文君王則  
七言見志陸機之價難偕鄭衆之心莫遂古人往矣吾

將已而諒紛紛於來者欲停觴而遲誰永懷掩抑遐思  
歔歔鑒往行之得失悟前賢之是非至如龍章鳳姿之  
異鵬化鵬立之姿重瞳駢脇龜背虎脊莫不截野格禽  
深江斬螭梓搏犀兕磔裂熊羆藉魚爛之勢興龍變之  
機日虧星隕海動山移澶漫輞亂推斥支離然後續百  
王之鴻烈應五運之昌期於是玉帛郡國鐘鼓神祇疊  
聳醪醴籩俎鼎脔周旋登陟以嚴以私威儀文物繽紛  
陸離禮樂戎狄冠義蠻夷轟然一瞬電威風馳明遠歎

蕪城之作子山叙離別之詞雖寂寞而遠矣良咨嗟而  
愍之若夫舒巧矜談沽多肆慾崩通一說而亡三墨翟  
九拒而餘六智不如葵義輕於粟資汎說而有餘在通  
議之不足置此獨幽沈昔人難復尋艤舫繞南浦薜荔  
滿西林嶺遮亭而青獸不起松橫水而蒼龍欲沈鷗泛  
空而點雪月零波而蕩金獨徘徊以無侶悄持觴而未  
舉歎巨卿之不來嗟子皮之乖阻胡不長逝子而隱憂  
决比德於單卷逝追踪於許由道匪五往思無三求與

偃僂而同去共支頤而云休孰得孰失何思何讐豈若  
介子推之怨晉費子陽之泣周煙飈勃起涕泗橫流徒  
血盡於雙目竟灰錯於一丘所以順世浮沈與時消息  
冥神觀化何往不極齧缺之間惡乎知哀貽之心莫之  
識今昔茫茫興衰運長超然委命於何不臧亦何悲於  
麟獲亦何嗟於豹藏薜葉離披之烏槐根擁腫之場白  
鷗兩岸青莎一床遇四老而極逸逢七賢而甚荒露濕  
書笈塵生藥囊揚子袍穿仇生室方結痛飲之山簡就

蔬餐之袁唐我有遐說超然自悅鄙文馬與華軒況金  
臺之玉闕藥不可還童方難為馭風莫希魚背客不作  
鹿門翁門何山而不對水何徑而不通雲歸則千峰卧  
綠桃飄則一川踏紅南灣漁者東郊老農形骸坐類襟  
帶自同或刺舟而共去或駕犢而相從採藥於巖下行  
歌於里中兒童目以癡叔鄉人指作愚公怪蔣詡之徑  
狹笑孫登之室空昔者梁伯鸞之牧猪馬仲圭之墨兔  
毛公隱身於博徒嚴生攻書於卜鋪咸蓄奇聲共沈高

步雜閭里而寄清汨塵泥而自汙我亦悠悠何遠去留  
方寸自足徒勞外求入煙霄而何樂處城市而何憂於  
是抵鄧郭出林丘九衢駢羅而自適三市紛譁而自遊  
棖楹接拱輓輅連輶金碧簇而霞爛羅紈開而浪浮曉  
入屠肆春遊酒樓卧白犬於甕下懸青蚨於杖頭並肅  
父以補履同庖丁之解牛遇茅狗之迎酒嫗逢木羊之  
隨葛由旗亭日將夕百戲忘休息漢女踏紅綃海人拋  
赤仄飛塵宵合囂聲晝塞泥燭巧成皮錢妙飾滌器則

或損殊材當壚則時逢麗色與商丘而同懷共文賓而  
晦跡斥鷃逍遙藩籬可巢不憚負局何羞膏膠或有貨  
藥藏名傭書養志或屠狗於橫街或奔牛於列肆道合  
情同心諧跡似穢體濁形捐聰斥智雖殊之於萬途咸  
趨之於一揆天道云云亡知喪真孰能國士吾為市人  
德與時而偕益道隨行而日新一牛衣以溫體五羊皮  
以易身羅衣駭目麗質驚鄰詎謂正色寧吾所珍不望  
豹變非圖獲伸誓洗耳穢那挑指文惡心長而髮短驗



萬亡而古存損又損以立標材不材而用神伊大道緬  
邈而不極聊糟粕於斯文乃援琴而歌曰茫茫大塊兮  
滄淪遶適生我至德兮其心孔殷茫茫兮孰知其施道  
之虛維吾之廬闌之隘維吾之賓矣道之謚維吾之室  
闌之囂維吾之黨矣杳乎徐乎遼乎冥乎維吾之娛矣  
剛龍之蟠長雲兮天矯蜿蜒修鱗之喜橫海兮紛潏潏  
沿游神於六合之外兮希夷自然又歌曰曾瀾起兮風  
自飄雲溶溶兮連沅寥微風息兮波以平雲霏霏兮開

宵冥重巖邈兮修已遠洄潭渺兮深復淺羽余觴兮空  
余壘玉顏醜兮山已頽義皇何以不復回捐形棄世兮  
如我何哉金踴躍兮求莫邪為不祥兮將奈何招隱者  
歌曰大道悠悠而熙熙吾莫知施誰宗樂子吾其嗣之  
至化蕩蕩而一一吾莫知專誰師樂子吾其與焉歌闌  
杉竹蕭然而迭響鳥獸徘徊而更鳴怡然鼓琴抗然起  
舞於是標問答纂歌詩不知其強名為賦之

中隱賦 有序

宋王炎

三衢留侯以中隱自處范石湖為書二大字以表章之  
侯有中隱對自叙甚詳夫若隱若顯內心泰然不為圭  
組所累侯之志高矣顧進為於世功大名白民受其賜  
侯未可辭此責也乃賦之曰

子留子道高而位下豐蓄而嗇施發揮所有可以雷霆  
一世而畏人之知沈酣自得於理義之府盤薄不驚於  
功名之塗適以中隱扁其室廬團蒲曲几詩編酒壺凡  
世間尤物一切無有蓋淡乎如逋客之舍幽子之居吾

見其鼻間栩栩焉泰顏色殆將貴吾身於隨侯之珠眇  
外物於秋蟬之翼此所謂與道逶迤一龍一蛇不露文  
彩如玉如石者邪夫孤竹二子采薇西山揭日月於百  
世之上可望而不可攀槁項黃馘山澤下士徒悅其風  
未喻斯旨友麋鹿於閒曠之墟翫魚鳥於沅寥之溪惟  
陸沈而無用徒牢關而固拒故荷蕢與耦耕均聖門所  
不許萬夫一賢天地間氣海涵岳負以育德游刃迎解  
以為智陽潛於泉則草木無色雲出於山則膏澤千里

古之抱此道者屢脫富貴而無累蟬蛻塵埃而不緇然  
燕坐一室而經營四海未嘗泊然與世而相遺投耒耜  
而執玉釋版築而乘車萬物賓從受其寵綏蕭條陋巷  
之布衣詰屈乘田之小吏非為我而不為蓋欲為而不  
遂先生彈冠而出曳履而趨豈無意於斯人而何以隱  
為漆園傲倪達近乎詭金馬翫世和失之鄙準繩以中  
又安取此有如樂天可謂賢矣不膏肓於丘壑之下不  
柴柵於縉紳之間招釋子於匡廬之阜呼酒徒於香林

之難得喪而忘去就俱閒無乃欲眇今世而尚友與斯人而比肩雖然進退有正以義為主可否無固因時為度元和之際猶莫盡其所懷長慶之後可飄然而引去時既異而轍殊何必追其故步曲阜之野麟出而非岐山之陽鳳鳴而宜可隱而見其中躁可見而隱其德孤吾欲與白傳異議迺中以招隱之詩其詩曰白銀雙闕高巍巍佩印如斗生光輝藥石之妙國可醫縮手未試衆遲之前旒側席九天上青雲發軔遙其驅

梅花主人賦

元陳櫟

古舒牧伯邪律相公稟受間氣生於遼東鳴綠平壤地  
靈所鍾期梁棟乎宇宙榜一軒兮以松松之所友允矣  
梅花以髯龍之鬱鬱盟玉葩之橫斜與素兄為主人免  
其羈孤於天涯搜清吟之千首盡發舒其英華梅見詩  
書實焉是取公取其花豈同兒女惟此梅之嘉實與商  
鼎以和羹何以有雨肥之紅綻花乃實之所由生三冬  
閉塞萬木韜精獨此花之先春耿冰雪而惟馨似君子

之特立殊弱植之彫零公取其花乃待其實豈作牧之  
能奄行作相而爰立森萬松於軒外棟明堂而當屹摘  
梅實以調鼎蓋權輿於今日斂大惠於一州豈獨私乎  
舒民寄語滯岳與皖公汝安能久留此梅花之主人

歸田賦

漢張衡

遊都邑以永久無明略以佐時徒臨川以羨魚俟河清  
乎未期感蔡子之慷慨從唐生以決疑諒天道之微昧  
追漁父以同嬉超埃塵以遐逝與世事乎長辭於是仲



春令月時和氣清原隰鬱茂百草滋榮王睢鼓翼倉庚  
哀鳴交頸頡頏關關嚶嚶於焉逍遙聊以娛情爾迺龍  
吟方澤虎嘯山丘仰飛織繳俯釣長流觸矢而斃貪餌  
吞鈎落雲間之逸禽懸淵沈之魴鰕於時曜靈俄景繼  
以望舒極盤遊之至樂雖日夕而忘劬感老氏之遺誠  
將迴駕乎蓬廬彈五絃之妙指詠周孔之圖書揮翰墨  
以奮藻陳三皇之軌模苟縱心於域外安知榮辱之所  
如

歸田賦

晉張華

隨陰陽之開闔從時宜以卷舒冬與處以城邑春遊放  
於田廬歸邾鄆之舊里託言靜以閒居育草木之謁蔚  
因地勢之丘墟豐蔬果之林錯茂桑麻之紛敷用天道  
以取資行藥物以為娛時逍遙於洛濱聊相伴以縱意  
目白沙與積礫翫衆卉之同異揚素波以濯足沂清澗  
以蕩思低徊往留棲遲菴藹存神忽微遊精域外藉纖  
草以為茵援垂陰以為蓋瞻高鳥之陵風臨儵魚於清

瀨眇萬物而遠觀修自然之通會以退足於一壑故處  
否而忘泰

節遊賦

魏  
曹植

覽宮宇之顯麗寔大人之攸居建三臺於前處飄飛陛  
以凌虛連雲閣以遠徑營觀榭於城隅亢高軒以迴眺  
緣雲霓而結䟽仰西岳之崧岑臨漳滏之清渠觀靡靡  
而無終何眇眇而難殊亮靈后之所處非吾人之所廬  
於是仲春之月百卉叢生萋萋藹藹翠葉朱莖竹林菁

蔥珍果含榮凱風發而時鳥譙微波動而水蟲鳴感氣  
運之和順樂時澤之有成遂乃浮素蓋御驛騶命友生  
攜同儔誦風人之所歎遂駕言而出遊步北園而馳騫  
庶翱翔以寫憂望洪池之滉漾遂降集乎輕舟浮沈蟻  
於金罍行觴爵於好仇絲竹發而響厲悲風激於中流  
且容與以盡觀聊永日而忘愁嗟羲和之奮策怨曜靈  
之無光念人生之不永若春日之微霜諒遺名之可紀  
信天命之無常逾志蕩以淫遊非經國之大綱罷曲宴

而旋服遂言歸子舊房

節遊賦

魏楊修

爾乃息偃暇豫攜手同征遊乎北園以娛以逞欽太皞  
之統氣樂乾坤之布靈誕煙煴之純和百卉挺而滋生  
谷風習以順時撓百物而有成行中林以彷徨翫奇樹  
之抽英或素華而雪朗或紅彩而發頰綠葉白帶紫柯  
朱莖楊柳依依龍鍾蔚青紛灼灼以舒葩芳馥馥以播  
馨嗟珍果之叢生每異類而絕形稟冲和以固植信能

寔而先榮於是迴旋詳觀目周意倦御於方舟載笑載  
宴仰沂涼風俯濯纖腕極歡欣以從容乃升車而來返

遊北山賦

有序

唐王勣

吾周人也本家於祁永嘉之際扈從江右地實儒素人  
多高烈穆公感建元之耻歸於洛陽同州悲永安之事  
退居河曲始則晉陽開國終乃安康受田墳壠寓居倏  
焉五葉桑榆成蔭俄將百年勣南山故情老而彌篤東  
坡餘業悠哉自寧酒甕多於步兵黍田廣於彭澤皇甫

謚之心事隴畝終焉仲長統之規模園林幸足獨居南  
者時遊北山聊度世以為娛忽經年而忘返西窮馬谷  
北達牛溪丘壑依然風煙滿目孫登獨坐對嵇阮而無  
言王霸幽居與妻孥而有興窓臨水石砌遠松篁類田  
叟之去來亦已久矣望山林之故道何其樂哉詩者志  
之所之賦者詩之流也式抽短思即為賦云

天道悠悠人生若浮古來賢聖皆成去留八省四乳龍  
顏鳳頭殷憂一世零落千秋暫時南面相將北遊玉殿

金輿之大業郊天祀地之洪休榮深貴重樂不供愁何  
況數十年之將相五百里之公侯兢兢業業長懼長憂  
昔怪燕昭與漢武今識圖仙之有由人誰不願直是難  
求聞鼎湖而欲信怪橋山之遽修玉臺金闕大海水之  
中流瑤林碧樹崑崙山之上頭不得輕飛如石燕終是  
徒勞乘土牛已矣哉世事自此而可見又何為乎惘惘  
棄卜筮而不占將縱心而長往任物孤遊遺情直上覺  
老釋之言繁恨文宣之技癢彼事業之遷斥豈神明之



宰掌物無待而成章生有資而必養嗟大道之泯沒見  
人情之委枉禮費日於千儀易勞心於萬象審機事之  
不息知澆源之浸長烏何事而嬰羅魚何為而在網生  
物詭隔精靈惚恍莊周三月而不朝瞿曇六年而遐想  
有是夫况吾之不如先達乎請息交而自逸聊習靜而  
為娛遂披林樾進陟岐嶇連峰雜起複嶂環紆歷丹危  
而尋捷徑攀翠險而覓脩塗聳飛情於霞道振逸想於  
煙衢重林合沓以齊列崩崖磊砢而相扶覩森沈於絕

礪視晃朗於高嶠自謂搏風颺而出埃壙邈若朝玄宮  
而謁紫都碧巒之下清溪之曲望隱隱而繞通聽微微  
而不屬眷然引領茲焉頓足步擁石而遭迴視橫煙而  
斷續古藤曳紫寒苔布綠洞裏窺書巖邊對局髮髯靈  
蹤依希仙躅竈何代而銷金杯何年而溜玉石室幽藹  
沙場照燭松落落而風迴桂蒼蒼而露溽月未側而先  
陰霞方昇而已旭喜方外之浩蕩歎人間之窘束況乃  
幽谷藏真傍無四鄰紫房半掩玄壇尚新逢閭風之逸

客值蓬萊之故人忽據梧而策杖亦披裘而負薪荷衣  
薜帶藜杖葛巾出芝田而計畝入桃源而問津昆丘若  
礪渤澥揚塵栽碧奈而何日種瓊瓜而幾春自然詭異  
非徒隱淪乃有上元仙骨太清神手走電奔雷耘空時  
朽河間之業不齊貫淮南之術無虛受祝動南極符迴  
北斗偃佺贈藥麻姑送酒青龍就食於甲辰亥牛自拘  
於乙丑永懷世事天長地久顧瞻流俗紅顏白首儻十  
秋之可營亦何為而自輕昔時君子曾聞上征忽逢真

客試問仙經談九華之易就叙三英之可成拭丹鑪而  
調石髓裹翠釜而出金精珠流玉結雪耀霜明咸謂刀  
圭斲近足使雲車下迎紛吾人之狹見覺羣疑而自拂  
使捉足而咸安亦何為乎此物彼赤城與玄圃豈憑虛  
而構窟但水月之非真譬聲色之無佛過矣劉向吁嗟  
葛洪指期繫影依方捕風誰能離世何處逃空假使遊  
八洞之金室坐三清之玉宮長懷企羨豈出樊籠徒勞  
海上何事雲中昔日蔣元卿之三徑陶淵明之五柳君

平坐卜於市門子真躬耕於谷口或託問閑或潛山藪  
咸遂性而同樂豈違方而別守吾無所徒斯焉獨遊屬  
天下之無事遇山中之可留聊將度日忽已經秋菊花  
兩岸松聲一丘不能役心而守道故將委運而乘流伊  
林間之虛受固樵隱之俱託逢去老於中溪遇還童於  
絕壑雲峰龜甲而重聚霞岫龍鱗而結絡水出浦而潺  
潺霧含川而漠漠是忻是賞爰遊爰豫結蘿幌而迎宵  
敞茅軒而待曙爾其雜樹相糾長條交茹葉動猿來花

驚鳥去起公子之殊賞瞻王孫之遠慮山水幽尋風雲  
路深蘭窗左闥茵閣斜臨石當階而虎踞泉映牖而龍  
吟月照南浦煙生北林閱丘壑之新趣縱江湖之舊心  
道集吾室風吹我襟松花栢葉之醇酎鳳翽龍脣之素  
琴白牛溪裏峰巒四峙信茲山之奧域昔吾兄之所止  
許由避地張超成市察俗刪詩依經正史康成負笈而  
相繼根矩樞衣而未已組帶青衿鏘鏘儼儼階庭禮樂  
生徒杞梓山似尼丘泉疑洙泗忽焉四散於今二紀地

猶如昨人今已矣念昔日之良遊憶當時之君子佩蘭  
蔭竹誅茅席蒞樹即環林門成闕里姚仲由之正色薛  
莊周之言理解石橫肱逢流洗耳取樂經籍忘懷憂喜  
時挾策而驅羊或投竿而釣鯉何圖一旦遽成千紀木  
壞山頽舟移谷徙北岡之上東巖之前講堂猶在碑書  
宛然想問道於中壺憶橫經於下筵壇場草樹院宇風  
煙昔文中之僻處諒遭時之喪亂局逸步而須時蓄奇  
聲而待旦旅人小吉明夷大難建功則鳴鳳不聞修書

則獲麟為斷惜矣吾兄遭時不平歿身之後天下文明  
坐門人於廊廟瘞夫子於佳城死而可作何時復生式  
瞻虛館戴步前楹眷眷長想悠悠我情俎豆衣冠之舊  
地金石絲竹之餘聲沒而不朽我何所營臨故墟而掩  
抑指歸途而歎惜往往溪橫時時路塞忽登崇岫依然  
舊識地迴心遙山高視直望烟火於桑梓辨溝塍於鄉  
國前臨姑射之西正是汾河之北張矣懷抱悠然川域  
憶昔過庭童顏稚齡何賞不極何遊不經弄春風於磧



戶詠秋月於山扃北窗照雪南軒聚螢綵衣扇枕緇布  
問經何斯樂之易失倏銜哀而茹恤天未悔禍遭家不  
秩子敬先亡公明早卒吾自此而浩蕩又逢時之不仁  
天地遂閉雲雷漸屯與沮溺而同趣共夷齊而隱身幸  
叔元吉坐偶昌辰容北海之嘉遯許南山之不臣養拙  
辭官舍和保真豈若馮敬通之誹世趙元淑之尤人殷  
憂恥賤憔悴傷貧探井臼之無樂歷山河而苦辛豈知  
我家生事都廢棄置不念當歸寧圖遠志坐青山而方

隱遊碧潭而已喜舊之出處絕氛埃登高日暮心悠哉  
子平一去何時返仲叔長遊遂不來幽蘭獨夜之琴曲  
桂樹陵晨之酒杯立園散誕窟室徘徊坐等枯木心同  
死灰亦有山羞野饌蘭槩木杲杞葉煎羹松根溜醪既  
採藥而為食諒隨情而不矯負鋤春前腰鎌歲杪草漸  
密而饒蟬樹彌高而足鳥地寂寞而森深路縱橫而窈  
窕野亭鶴唳山梁雉鳴遠遊之所幽棲之次或抱犢而  
新來乍聞雞而始至藿畦一兩茅齋數四山為險而無

人嶺時平而有地石菌抽葉金芝吐穗鏡執山精刀驅  
水魅泉繞砌而魚躍樹橫窗而鳥萃天網何寬人生幾  
難飲河知足巢林必安亦何榮於拾紫亦何羨於還丹  
紅藜促節之杖綠籜斑文之冠野餐二簋園蔬一盤送  
阮籍而長嘯得劉伶而甚歡曉入柴戶暮歸藥欄老菜  
地僻鄒生谷寒楊柳則條垂鍛沼杏樹則花飛坐壇賦  
或鼓吹詩如彈丸攜始醉之鳴鶴對新婚之伯鸞我有  
懷抱蕭然自保古人則與子同歸紛吾則此焉將老澗

溪沼止之蘋艾丘陵坂險之桑棗接果移桑栽苗散稻  
不藏無用之器不愛非常之寶抵玉驚禽揮金雜草接  
朋友於盃棹弄兒童於襁褓樂山澤之浮遊笑江潭之  
枯槁戒非佞佛齋非媚道無譽無功形骸自空坐成老  
圃居為下農身與世而相棄賞隨山而不窮披衣竈北  
逐食牆東儻有白頭四皓龐眉八公小童乘日仙人馭  
風鄉老則杖頭安鳥邦君則車邊畫熊心期閭合道術  
潛同解來相訪愚公谷中

閒遊賦有序

唐徐魁

余嘗讀易至謙豫二卦乃廢書而歎曰嗟乎天道其何  
遠哉故逍遙山阿內身外物自保幽靜庶無悔吝遂援  
毫命牘賦閒遊之章云爾

夫居幽而思遠兮固先達之所言吾乘玄以靜拙兮亦  
自得於丘園羨馬蹄之踐雪兮憐澤雉之處樊竭歸來  
以遂志兮豈榮華之足敦傍山阿而葺宇兮即樹援而  
啓門爾其山則盤紆深沈穹窿杳藹下枝迴溪上瀉懸

瀨絕峰交竦深林縈帶魚鳥歛以來往煙雨紛其雜會  
喧以騰倚之獸蔭以偃蹇之木百藥爭妍千芳競馥紫  
芝所業黃精所蓄玄猿遊嘯於陰林惠風徘徊於陽谷  
澗緜靡而成文泉漱鏡而自肅若乃春華既落秋實就  
成翔雲疊疊流月亭亭高蟬嘶韻玄鳥辭楹氣淒清而  
開朗露凜冽而含清或傍徨乎松壑亦偃息乎林扃覽  
五聖之餘軌酌三古之遺經信居謙而履福如在豫而  
忘鳴遵養性於黃術鑒止足於老生欣松屑之可餌歎

黃金之未成至乎身乖俗偶志罷世紛坐鄰沙雪卧接  
煙雲耿長宵而未寐乍含詠以成文傷孤鴈之失伴懷  
哀鵠之離羣何物類之多感鬱余懷其誰語希體逸而  
心廣願飄然而高舉美人兮巖阿芳菲兮襲予天奄冉  
其將暮山蕭條而無侶發清琴以輔志操長歌以延佇  
歌曰上幽岫兮得所欽山蔬陳兮桂酒斟嗟草木兮樂  
春心悼日月兮遊相尋貴龍鳳兮就高深悅張邴兮託  
蕭森歌響既畢月已沈乃擁荷蓋命漢舟越蘭渚泛滄

流意超遙其誰恨何俗累之為憂傷路人之狹隘聊放心以閑遊

弟子清夜游賦

宋陳普

弟子丘和中年少而婉淡而腴靜而秀同而不污粹然孝悌之性懷然學道之志也瀟然出塵之姿退然有下人之意也父母不以為愁宗族不以為幼少者願以為兄長者願以為友懷春風美秋月喜豁館愛澡雪富貴欲為伊尹太公貧賤欲作陶潛康節乃者殘暑殺秋風



生二氣正兩儀平煙霞霏霏而徐斂明月高高而按行  
清氣不知其從來如混沌破而海岳呈高風莫見其從  
來如江虹起而海潮橫於是乘發機循應迹以曾點為  
主以東坡為客據依洛春遊觀赤壁假酒借肴抱道懷  
德陪從師友經歷親戚過小橋而道東臯訪平山而入  
南陌或有思而少止或立語而移刻或遠聽而澄神或  
靜觀而正色乃者歲朝明堂燹惑潛慝露華百室析靜  
萬國澗水有聲教吾言青山無語教吾默天地廣大示

我宏萬象有體示吾則天下三樂無愧於孟軻人生百  
體不負於蔡澤而况荷風蘭露沐我以芳馨梧月菊霜  
粹我以潔白而今而後束筋骨修禮容奉家庭而唯諾  
見齒德而彌恭敬五事而迓百福不負百年之身以答  
塞此生之逢也先生以為如何予曰可教矣本領端正  
而枝葉條達矣交揖而歸閉戶擁衾端起予之鼻息隨  
轉午之庭陰

客游玄都賦

有序

宋 沈與求

南陽公數微不腆之文然街談巷語陶寫性情已卽擲  
去如棄唾漫不復顧省寧暇著橐刺人目邪既數月公  
更書下餞客在門恐遂泯默則為他日恨輒賦客游玄  
都因公懸弧之旦用以為壽其辭曰

客有夢遊玄都之宮觀一公子緇衣繡裳下觀蠻觸之  
閭儼衷甲乎戰場俄而免胄四顧周章少焉休矣息閑  
影藏粵有一老長身臞然深衣而黑緣緩歌擊節起舞  
蹁躑揖公子於下坐曰予方外之堯客不知人間禮法

之嚴公子之貴也抑嘗觀蜡齒於列座訪燕毛於廣筵  
莫如予年長矣公子其自言之公子曰嘻先生其眇予  
也邪予生於三江長於五湖跨瑤光之象負溫洛之書  
蓮房晨嬉著室夜娛嗟日月之幾何戴神屋其如初此  
猶未足以語壽也蓬萊岱輿員嶠方壺以與夫瀛洲五  
山之根出沒乎歸墟彼舉首以戴之從禺疆而遞命者  
實予之徒也先生以為何如先生爵里奚居譜牒奚自  
豈周穆王之遺民抑丁令威之嫡嗣也不然何得渠略

視予而以大老自恃邪先生曰有是哉子壽可期可以  
策計若子壽者蓋不知其紀也一瞬目而千歲一舉足  
而千里鍊金氣於丹臺之爐導玉腴於華池之水引脰  
長嘯聲聞帝庭子夜沈沈天門未扃刷騏驎之捷步從  
鸞鳳之翹翎縹緲碧落徘徊紫清羣仙命予以九還之  
使持絳節而擁霓旌公子曾未免夫泥塗之累網罟之  
患豈足以族十五鰲而友四靈者哉公子曰然則奈何  
先生曰公子中溫文而外健武能納新而吐故其亦壽

之類也曷不捨輿梁趨爽塏以為生之衛也予聞南陽之墟下有菊潭公子其往遊焉朝緩步而夕至也酌餘波之清泠擷遺芳之藿蘼屬霞觴而自侑渺天香之泛齒插子翼乎崑丘庶幾閑少廣之終始公子曰唯唯覺而賦之以薦乎南陽公之壽凡

大遊賦

有序

元吳萊

毘陵道士盛允升東遊會稽予聞其風神穎異被服蕭爽蓋將自是而汗漫六合者也張君子長約同送之賦

用是作遂題曰大游

夫何一高士兮獨曠視乎八區朝吾車之風駕兮夕予  
至於清都仰天路之迢遞兮挾陵陽而與俱翹剛風而  
顛倒景兮浮沆瀣而喻青霞蜚廉起而前導兮輟靈霍  
使後驅素蜺天矯而為纓笈兮神鳳翩褱以揭旗恍大  
游之所歷兮撫四海其無家嗒塵濁之不可以止息兮  
吾將抵乎崑崙之遺墟嗟東轅之我顛兮探宛委之嵌  
穴帝禹告予以所藏兮發濤江之漲雪登桐柏之嶄巖

兮瞰赤城之嵒嶭颺蓬嶠而我欲徑到兮恐蜃樓之明  
滅歛南轉而弭節兮過滂霍之層峰放盛唐之滙怒兮  
梁魚鼈而躡蛟龍倚巫山之臺觀兮莽峨嶠之雲松沂  
丹丘予定不死兮躋羽國以從容習浩歌而西邁兮適  
金天之沃野導黃河而吸石室兮王母被髮以嘯處尋  
秦一與九峻兮貫華陰之幽岵招韓衆而許度世兮固  
肉人之弗遑遽覩迺北折而亟去兮出鴈門之嚴寒恒  
嶽縣亘乎不絕兮縋碣石於瀰漫搜赤舄於遺榛兮簸




樓船乎狂瀾候雞鳴而直上日觀兮吾特痛夫仙學之  
艱難伊天地之晦冥兮倏陵谷之遷徙遭女媧之降阜  
兮顧嵩少之嵒起經陽都之酒家兮躋王屋之石髓披  
河上之靈筌兮摘漆園之真旨惟小別而千齡兮復一  
瞬以萬里劃狐鳥之丘垤兮洞蟪蛄之年紀心委蛇而  
自神兮形曠蕩其離滓信吹萬之不同兮恒抱一以終  
始胡久居乎寰內兮欲絕出於大荒攀建木而與為陟  
降兮絙鐵鐐於無傍瞻帝車之中運兮閭闔闔以上征

屈軒轅之蹉伏兮耿招搖之耀芒引弧井之壘落兮炫  
奎壁之圖章繡龍漢之寶歷兮徹鬱繼之神鄉幸置身  
於一氣兮卒齊壽於三光宜凡夫之穢濁兮又孰契夫  
大道而翱翔自放懷於天外乎眇累塊於千億惕世途  
之發噉兮危螭螳之營役豈耽名而嗜利兮或酣酒而  
溺色諒金石之銷泐兮竟丘壘之堆積嘆吉雲之鉅數  
兮縲步景而我服歎甘露之靈壘兮和水玉以為食彼  
策精之有書兮吾尚懼夫骨錄之弗得將蕊珠之不遠

兮盡蚪蚪而莫識懿周流而至此兮聿笑傲以言旋樂  
自然之日月兮攬無鞅之風煙壓洞庭之浩渺兮展林  
屋之聯絲龍威蚴蟉而跼踞兮寶鎮晃朗而瑛鮮迺霄  
崢之欲杙兮覺鼎竈之猶然燭大還而蟬蛻兮擊小有  
以鶴翩躬虛無而不宅兮味澹泊以為淵等古今於一  
軌兮混生死其同鄧儼坐在而立蛻兮蘊執袂與拍肩  
真山澤之一臞兮夫豈論乎三壘暨九仙固道術之所  
致兮曷曲謾而究旃馳箋語而往訣兮却永存於上玄



御定歷代賦彙外集卷十一



總校官庶吉士臣張能照  
校對官編修臣楊壽楠  
謄錄監生臣吳鏞